

四庫全書

集部

欽定四庫全書

集部

望溪文集卷五十二

詳校官編修臣李堯棟

中書臣劉源溥覆勘

總校官進士臣朱鈐

校對官監丞臣張魯炳

謄錄監生臣李金玉

欽定四庫全書

篁墩文集卷五十二

明 程敏政 撰

祭文

南山賜陞填塘告文

維弘治三年歲次庚戌冬十二月戊申朔六日癸丑孝男詹事府少詹事無翰林院侍講學士敏政敢昭告于顯考尚書少保襄毅公曰陞垣大門之前舊開有塘一畝近日常聞人言方位非宜謹擇初七日興工填漲仍

舊作田以供祀事惟神鑒之謹告

代塏姪葬父告先墓文

維弘治三年歲次庚戌冬十二月戊申朔六日癸丑孤
子塏敢昭告于先祖考徵士府君先祖妣吳氏孺人墓
下曰先考去世於今三年藁殯僧房未得安居茲者得
卜于祖塋之東將以初七日興工開壙伏冀尊靈默加
陰祐俾我後嗣永獲依歸惟靈鑒之謹告

七弟啓殯告先祠文

維弘治三年歲次庚戌冬十二月戊申朔八日辛卯孝男詹事府少詹事兼翰林院侍講學士敏政敢昭告于顯考尚書少保襄毅公曰惟二弟敏德殯于南山祠堂歲月茲久近始得卜于水橋干於先塋之東擇以是月九日啓殯安葬不勝哀悼之至伏惟尊靈尚其鑒之謹告

祭亡弟文

維弘治三年歲次庚戌冬十二月戊申朔八日辛卯

兄令男孺以牲醴之奠致祭于亡弟故詹事府簿判蘄州事克儉之靈曰嗟嗟吾弟藁殞僧房卜窆三年未定所今茲獻吉乃近先塋歲晏時良為君安厝所恨垂蹇久病家居未得躬親撫棺掩土神傷涕殞命也奈何永訣一觴言不能盡嗚呼哀哉尚享

代塋姪啓殯告文

維弘治三年歲次庚戌冬十二月戊申朔八日辛卯孤子塋敢昭告于顯考詹事府簿判蘄州事府君曰慟惟

顯考之柩暫寓南山僧舍於今三年每每擇地佳兆難逢今者得于水橋干祖塋東畔向甲負庚敬禱于神一占告吉謹消是月九日奉啓殯殮就彼安厝以少逭不孝之罪泣血上請惟尊靈鑒之謹告

先祠奉安告文

維弘治三年歲次庚戌冬十二月戊申朔九日丙辰孝玄孫詹事府少詹事兼翰林院侍講學士敏政敢昭告于顯高祖考者宿處士府君顯高祖妣安人吳氏顯曾

祖考贈兵部尚書兼大理寺卿府君顯曾祖妣贈夫人
汪氏顯祖考贈兵部尚書兼大理寺卿府君顯祖妣贈
夫人張氏顯考南京參贊機務兵部尚書兼大理寺卿
贈太子少保襄毅公曰藐孫不肖獲承有家守官弗良
有玷先訓蒙恩寬貸屏退家居上奉慈親下撫孱子終
鮮兄弟孑然一身多病相仍歷時經歲冥冥衛護寔賴
先靈幸保餘年以供祀事載惟門戶爰及家庭考古定
方多未協吉徵諸夢寐衆議攸同謂啓東門庶免悔吝

日者上請厥工告成重念先祠逼近喧雜大懼褻慢負
罪彌深伏見前堂高蔽深邃敬洵吉旦如式奉安仰冀
尊慈曲加庇佑憫茲老稚繫孫一人少逭憂虞俾圖不
墜英爽在上鑒此瀝誠尚享

改門告文

維弘治三年歲次庚戌冬十二月戊申朔十三日庚申
詹事府少詹事兼翰林院侍講學士程敏政敢昭告于
司門之神曰惟茲吉旦于宅之東開啓大門以便出入

牲醴致奠用告其成永永無虞惟神是賴尚其鑒之謹告

立帝告文

維弘治三年歲次庚戌冬十二月戊申朔三十日丁丑
詹事府少詹事兼翰林院侍講學士程敏政敢昭告于
立天上帝之神曰於惟上帝秉司化原開我生人功德
無量享郊配帝厥有故常惟此陋邦有嚴勝境雲巖之
上帝實臨之實厲而賜宸尊是賴家尸祝在禮攸

宜熾風小臣遭時乖蹇仰蒙陰佑感激難名茲遇歲除
奉安神御載陳明薦用告微誠尚享

祭臨塘范處士文

惟靈高平之宗臨塘之彥溫恭孝友位重鄉閭宜享遐
齡益綿晚福云胡一疾卧簀經時訃音相傳不勝驚怛
顧予不佞姻好有年多疾相仍未由徃予緘詞致奠用
白其誠靈兮如存矧其來格嗚呼哀哉尚享

祭汪孺人文

大理寺副
堅之母

惟靈毓秀名族歸于大家夫君中殞爾爾無諱內外一
詞允賢維配有子登庸侃侃廷尉榮膺鼎食褒享纓綬
名昭慈節壽儼喬松一疾幾時溘焉弗起哀音遠聞傷
悼曷已賢郎奔訃還自京師矧在姻眷執紼攸宜叢萱
萎霜寒日在戶機杼夜閒杯棬如故敬陳薄奠緬仰令
儀靈兮如在尚鑒于斯

祭武昌尹汪璽親家文

惟靈望出忠賢學優庠序擢秀桂宮綽有文譽禮闈

弗偶銓部登榮出宰花縣聿騰政聲豐碩之姿遠大之
器駿發有期允顯先系維茲之歲屢接手書吳楚睽隔
每歎離居夏秋之交忽聞訃告真質是疑曷任悲悼嗚
呼禍福相倚天意難諶吉人淪謝何善何淫矧在通家
情好維密子女聯姻雅非一日昔登公堂酌酒賦詩今
拜公像白日寒飈清醑一陳旅肴載設英魂何之幽明
永訣

祭常德同守致政李公文

太守廷壽之父

猗嗟李公去何速耶人所願于公者樂子孫之養享山林之福振清白之風勵浮靡之俗雖百年相期未為足也胡美疾之嬰遽至不祿使洛社之老咸弔影而相悲專城之子徒望雲而慟哭也惟公平生學苦行淑律已巖巖待人穆穆發奸之明久為吏師惠民之仁辰也良牧力孔殫於救荒心恒盡于治獄其督教也不速而成其佐軍也不令而肅衆美攸兼媿彼碌碌況恩出于上則再昇乎絲綸慶衍于家則森挺乎蘭玉公雖溘然捐

館而昭然在人者百世可錄也有偉專城繼公芳躅直
諒之行不阿清介之守彌篤視此邦民愛等春育斤歸
之人禮敬相屬緬想若翁音容可掬宜涕之不能自己
而語之不可以更僕也惟公之壽我序以祝惟公之行
我表以恭清濟之間新遷載卜遙奠一觴寄我遐矚渺
渺雲山萋萋松菊公神不忘鑒此衷曲嗚呼哀哉尚享

祭先師宮保尚書殿學劉公文

維弘治五年歲次壬子夏四月辛丑朔二十四日甲子

門生詹事府少詹事兼翰林院侍講學士程敏政謹東
向頓首告奠于先師宮保尚書殿學古直先生劉公尊
靈而言曰惟公鍾海岳之英抱經濟之學才氣振千古
之豪文章擅一代之作輔聖德于青宮贊廟謨于黃閣
有力扶正論之節莫久于鈞衡有陰翊宗社之功卒困
于桎鑿六旬初屆即返丘園百年為期遽翔寥廓何君
子企公之深而造物者遇公之薄也惟先君號金石之
交故賤子有門牆之託雖學健而行迂兼志強而才弱

寧以道為屈伸敢因時而前却歎我生之不辰而教言之如昨也訃音歛聞驚涕雨落日月推遷林野蕭索謝傳不起于東山司馬竟終于西洛此心皦日亦何損于衆咻世態浮雲曾直公之一喙顧生何知負恩懷忤身幸免于竄投病未離于砭藥遙瞻几筵一酌清酌公神如生鑒此哀悵嗚呼哀哉尚享

男樵畢姻告先祠文

維弘治五年歲次壬子九月己巳朔二日庚午孝玄孫

詹事府少詹事兼翰林院侍講學士敏政敢昭告于顯
高祖考耆宿處士府君顯高祖妣安人吳氏顯曾祖考
贈兵部尚書兼大理寺卿府君顯曾祖妣贈夫人汪氏
顯祖考贈兵部尚書兼大理寺卿府君顯祖妣贈夫人
張氏顯考南京參贊機務兵部尚書兼大理寺卿贈太
子少保襄毅公曰往者為長男錦衣衛百戶璵結親于
婺源汪氏寔惟故春坊司直貞一先生之雲孫今成都
太守公文燦之仲女以今八月二十七日畢姻上賴先

靈獲成嘉好祀事有託感喜交并謹以采盛禮齊潔牲
廢品用伸虔告尚享

祭甘母夫人文

徽州府同知昭之母

惟靈毓秀高門長歸著姓維女之貞維婦之令一子登
庸母儀既盛九袞將開人瑞斯應矧是賢郎名德兼勝
卓犖之才循良之政榮養方殷丕顯家慶褒封有期上
膺帝命仙齡不騫如山之靜童顏不衰如松之勁云胡
北堂嘉辰罔競計音相傳悲悼曷罄敏政泰在通家緬

思淑行遠道相望莫由申敬萱殞秋深猿啼夕暝臨風
一觴用達慈聽嗚呼哀哉尚享

壬子冬饑歲告復官文

不肖賜歸於茲五載課耕奉母循省不遑忽拜綸音特
從公議昭雪幽枉俾復舊官先訓明明幸茲罔隆霈恩
逾分益切冰兢饑歲有儀敢供厥事拜伸虔告惟靈鑒
之尚享

鄧州新建李文達公祠堂時祭文

代作

惟公高文碩學一代宗儒重德令猷兩朝元輔儀刑雖
遠盛烈如生乃眷鄉邦有嚴祀典仲春吉日恭薦常儀
仰止高山曷勝景慕尚享

祭魏參將文

代妹
婿作

惟公夙負英姿早膺世爵歷事元戎遂嫻兵畧征蠻西
徼禦寇中州民綏盜戢位進名流爰奉璽書佐鎮于蜀
威懾番夷令行部曲果敢之志精悍之才方期寵命授
鉞登臺云胡數奇乃爾一背罷其戎務還奉朝請驅馳

萬里有爽節宣國門告訃孰叩彼天惟我先君識公偉
器有女于歸百年是計今駛一旦虎委熊顛臨風大慟
撫膺何言靈輦朝行神劍夜吼追想風儀如左如右芳
殺崇俎清酌滿卮公兮不亡來格於斯嗚呼哀哉尚享

新居祭五祀文

維弘治六年歲次癸丑秋七月癸巳朔二十一日癸丑
詹事府少詹事兼翰林院侍講學士程敏政敢昭告于
司命之神司竈之神土地之神司門之神司厲之神曰

邇者不佞仰承國恩復建舊官爰置新第肇工興作自
夏及秋乃底于成繫神是賴奉親挈穉今日來居上妥
明靈用仲虔告牲醴在奠伏惟鑒之

祭親家凌揮使文

故懷遠將軍致政揮使凌公尊親之靈曰嗚呼發身介
冑致位金緋公之壯歲屢涉艱危上慕松喬遠遊江海
公之晚年容色未改金丹有訣謂可延齡紫府無階必
俟登名我歸江南尚及一訪我還京師公已長往矧公

愛子玉瘞堪憐復有貳室繼居九泉累累三喪丹旌素
畧行道傷嗟況于至戚惟予女弟寔配公男請誌斯墓
義非所堪發引有期東臯託處古道西風幽堂殘暑世
傳尸解公或未亡竚其來格受此一觴

祭故叔祖三處士文

曰嗚呼崇禮守道晦跡家庭處士之德衆仰儀刑年開
八袞日旣參苓處士之壽方樂康寧矧有賢子嗣其
德馨亦有哲孫繹其世經正宜遐福進享修齡云胡邁

疾大夜難醒敏政不肖入仕在廷忽聞訃報兩涕交零
嗚呼教言泯矣孰予歲銘族尊盡矣孰予使令吉壤之
下有美巖尙遺像之存有滿丹青牲進于俎酒瀉于瓶
尊龜如在鑒于冥冥嗚呼哀哉尚享

祭宮保尚書昌黎張公文

代士
敬作

惟公一代偉人四朝元老榮躋八座名重三孤早遂歸
休宜膺晚福況有顯嗣侍養家庭美疾俄嬰遽成永訣
年逾七袞訃上九重御奠龍章官營馬鬣隆隆恩禮同

輩幾人壽考令終公亦何憾玠以菲薄幸託姻聯知愛之深惠教之厚銘心有日報德無從緬想音容曷勝悲悼靈輿將啓旨酒在陳公神不忘鑒此誠意

祭金吾百戶李公文

惟公右魁之孫封君之弟如虎應填克承詩禮金吾被寵白社閒居一咏一觴時其卷舒孝奉親闈均處家政懿此平生孰踰高行矧是猶子詞林鉅公事叔如考由壯及翁百齡是期忽以恙告九原弗興聞者增悼銘昭

窀穸禮謹賄舍斯亦無憾何必多男瀚等誼在通家夙
懷惻歎方約登堂遽已捐館靈輅載駕薄奠一卮祝言
申敬公能鑒茲嗚呼哀哉尚享

祭家生子武文

維弘治七年歲次甲寅冬十二月丙辰朔越二十四日
己卯篁翁及壻官人令汝弟戎以庶飪之奠祭于家生
子武曰惟汝之生頗有資性因令就學遂至成人草錄
篇章繙閱圖典凡我文字皆汝職之家務之餘亦諧世

故我榮我辱率能相予陸走川行無不在後親戚故舊
見即汝憐為娶良家誕未彌月計汝言動曾未異常豈
期卒然自殞其命慙不至此聞之失驚數耶崇耶莫任
其咎我髮種種恒思故山從者雖多孰當予意感今悼
昔不覺泣然茲遣汝棺槨寄僧舍終歸汝骨瀛東之岡
晏歲匆匆賜汝飲食汝魂未散尚識予悲嗚呼哀哉尚
享

祭刑部周負外妻安人文

惟靈賦性端樸繁秀之鍾持身賢淑繁母之從慎不以
驕婦職惟敬儉不以華世業彌盛爾爾姑婢名尊位崇
安人奉之克盡子恭楚楚夫君高科早貴安人相之恒
若賓對有褒嚮誥天寵殊常有寶珠程彩衣增光閭祐
方殷云胡不壽玉毀于成蘭悴于茂某等哀聞萬里義
重維桑值茲發引將還故鄉庶饌旅陳清酌三奠人生
可傷如雷如電嗚呼哀哉尚享

祭宮保尚書大學士丘公文

嗚呼嶺海儲英異材間生公出其間遭遭文明翰苑紬
書經惟進讀聖烈宣昭帝心啓沃典教國子迨長宮詹
迪士敬簡行已安恬身歷四朝年開七袞乃受簡知入
贊宥密代言輔政寒暑五更國咨耆舊人傑治平累疏
乞休宸眷彌篤一卧弗興天奪奚速帝念元老卹典優
崇護喪歸窆孰與令終經世之才希古之學有偉曲江
相望何忤某等誼曾僚屬敬奠一觴靈車將啓生容在
堂追思話言感悼疇昔公神不亡矧此來格

祭寧侯祖塋文

代人作

猗惟張氏興濟名家善積累世慶澤無涯鍾美後昆啓
封昌國際遇非常恭慎靡忒駕生聖后配我今皇前星
炳耀宗社之光推本慶源孰期先逝存沒哀榮古今鮮
儼況有二子並立于朝長侯次伯位冠珥貂上世佳城
遠在故土乞歸掃松荷天之祐中宮有祭爰命近臣既
告竣事于情未申尋微之山藏公劒履思惟昔年予典
葬禮茲焉至止追悼奚勝敬陳一奠用表此情

開壙告文

維弘治九年歲次丙辰春正月庚辰朔初五日甲申直隸徽州府推官李珍敢昭告于故太子少保程襄毅公曰茲承上命為夫人林氏開壙以是月初六日辰時合葬公兆惟靈鑒之謹告

開壙告后土氏文

維弘治九年歲次丙辰春正月庚辰朔初五日甲申直隸徽州府推官李珍敢昭告于南山后土氏之神曰茲

承上命為故太子少保程襄毅公夫人林氏開壙以是
月初六日辰時合葬公兆惟神保佑

開壙告先考襄毅公文

維弘治九年歲次丙辰春正月庚辰朔初三日壬午孤
哀子敏政敢昭告于顯考尚書少保襄毅公曰慟惟顯
妣夫人林氏奄棄敏政得請于朝官給葬費事下本府
委堂上官一負前來開壙擇以是月初六日辰時奉柩
合葬無任摧裂之至惟靈鑒之謹告

開壙告后土氏文

維弘治九年歲次丙辰春正月庚辰朔初三日壬午太常寺卿兼翰林院侍講學士程敏政敢昭告于南山后土氏之神曰茲承王命為顯妣夫人林氏之喪遣徽州府堂上官一員前來開壙以是月初六日辰時合葬於顯考尚書少保襄毅公宅兆神其保佑俾無後艱謹以清酌脯醢祇薦于神尚享

祭李處士文

惟靈賦資醇樸履行溫恭雅志慕丘園之樂僑居嫺俎
豆之容身不伍于流俗志將亢乎名宗顯有令子明時
奮庸考循良之所自知善慶之攸鍾況乎九袞之齡將
開壽筭毀鬻之誥擬下恩封何旻天之不憖遽訃音之
告凶使闔郡之氓思攀轅而莫遂通家之士恨執紼以
無從遼山高壘歛水洊溶渺東邨之遠道望故宅之高
春靈車既駕孰任哀悰聊一陳乎薄奠徒悵隔于塵蹤

伐木告文

維弘治八年歲次乙卯十二月庚戌朔二十八日丁未
孤哀子敏政敢昭告于顯考尚書少保襄毅公曰慟惟
冠鵠之藏十有七載賜塋内外林木過繁或叢近兆域
之旁或根蟠來脉之上或三遮兩蔽無以自伸或縱出
橫生不能成列理當去其太甚庶使跣密得宜木性各
遂其生成地力不憂于匱乏墓場有廊清之美擴周無
侵犯之虞衆議僉同事非獲已茲用擇二十九日召工
將事惟尊靈鑒之謹告

告為顯妣樹碑文

維弘治九年歲次丙辰秋七月丙午朔越四日巳酉孤
哀子敏政敢昭告于顯考尚書少保襄毅公顯妣夫人
林氏曰惟顯妣夫人卹典碑二通刻完將以是月七日
樹立享堂東西用垂久遠先令匠氏築土興工惟靈鑒
之謹告

祭儒學生汪君承之文

嗚呼承之而止于斯邪屈指游從將十年矣道義相與

遠大相期孰意其性之淑而命之畸邪學博文瞻識遠才通在衆中豈可多得而竟無所施邪驥馳而踏木秀而摧徒使志士為之扼腕彼冥冥者之造物亦誠不可窺邪邇在山堂晤言甚洽病中來告曾幾何時而遽成永訣之悲邪發引在即抱病倚廬不能一往撫棺致慟其何以寫予之私邪師生之情死生之義盡此一酹夫復何言嗚呼承之其尚見知也邪哀哉尚享

祭侍御吳公文

故侍御吳公之靈曰嗚呼脫穎之資世經之學祖武克
繩鳳毛麟角名登黃甲官擢烏臺士論攸屬遠器良材
初按兩川再巡二浙威行惠流大振風節霜飛白簡芳
繡朱衣乘輅過里草木生輝入朝有期二豎為厄訃音
忽傳聞者駭惜敏政屬居苦塊承問諄諄書猶在几人
已隔塵遙望新墟敬陳薄奠通家之情有淚如霰嗚
呼哀哉尚享

祭祁母太孺人文

維弘治九年歲次丙辰冬十二月甲戌朔越二十一日
甲午太常寺卿兼翰林院侍講學士程敏政謹以牲醴
之奠致祭于祁母太孺人黃氏之靈曰惟靈賢明之行
淑慎之容重茲毓秀出自名宗敬戒之嚴柔嘉之懿允
顯來歸克承閭制相夫有道青氈是同邑黌郡序無慙
古風教子有成甲科之偶烏府黃堂式彰慈訓珍饈鼎
食祿養斯隆珠冠霞帔恩封聿崇楚楚諸孫環侍左右
洩洩高年踰八望九貴而能約五福攸宜耆而愈健百

歲是期安問幾時訃音忽告惟家之艱惟善之悼敏政
夙與令子義獲同朝逮守獎郡恒及窮荒美澤未霽
車已駕雲黯山陰江寒歛下臨風置奠力疾陳詞靈兮
如在少鑒其私嗚呼哀哉尚享

誥封恭人叔母劉氏祭文

惟靈賦質明淑制行端嚴配我明威益修閭政煌煌命
服赫赫恩封有子世官存歿奚憾慟惟堂殯歲月倏更
往合新阡秉茲吉旦載惟孤姪羈宦于京發引有期攀

號莫達辦香馳奠用告其哀靈兮如生鑒此誠意尚享

祭少保于公文

代于文
速平兵

嗚呼禮莫大于報功義莫先于繼絕況天定之勝人宜
恩典之昭晰猗我伯父一代人傑歷官孤卿上輔睿哲
有巍巍定難之功有侃侃立朝之節有孜孜及民之
惠有皦皦律貪之潔惟許國以忘身致權奸之汙蟻中
以深文濟之讒舌白日晝冥愁雲暮結慨重瞳之屢回
驚天柱之摧折雖丹書之橫惟魯白玉之可涅列聖嗣

統當食而輟追悼勲庸特加昭雪旌功有祠述行有碣
嘉繼世之象賢悵主祀而猶缺以我小子同源一轍擇
男允忠系于孫列廼具䟽詣宸聰上徹偉公識之翕然
果天顏之開悅錫世祿以奉祠士聞風而氣泄顧竊柄
之權奸已伏辜而烟滅仰忠勲之流芳炳日星之長揭
某涓以歲首自微到浙俯伏伺庭一筵敬設感殊寵之
下臨與有榮于哀拙冀衍慶于曾玄恭言孝忠之殫竭鳳
山蔭從湖水幽咽尊靈如生鑒此惓切

聞士欽李公訃位哭告文

太常少卿李公士欽之訃設位于南山堂薄致一奠哭而言曰嗚呼士欽止于斯邪致遠之器凝重之資明達之見通梗之才竟已矣而不獲大施邪春末得書知有暴疾甚懼後連得書知已漸平甚喜孰意其果不起而使我失聲以悲也平生健壯偉幹豐頤恒切嘆羨百歲為期乃未及半百而一旦去世邪嗚呼有善相勉有過相規言議之合酬酢之咨在至戚中惟士欽一人爾而

今而後其孰輔予以道而使予悵悵于既老之時邪念
自童稚受學太師托姻門下三十年于茲升沉離合不
能相一然此心耿耿千里可照曾弗少置于懷思也嗚
呼士欽其真止于斯邪山居歲晚江寒木萎臨風三酹
有涕漣濡嗚呼痛哉尚享

弘治十年歲除告文

曰邇者朝廷纂修會典上勤恩命召副總裁方在憂中
䟽求終制仰蒙眷念特賜矜從今茲久越禩期禮當趨

赴擇以明年正月十日就道敢因饒歲預告行期追遠撫時不勝感愴尊靈如在庶其鑒之尚享

奠故太常少卿李君尊親文

曰嗚呼去冬家山得君之訃大慟人生僅如朝露茲春來京君柩未行登堂一奠恍如在生通碩之才遠大之器孰不期君可紹先世玉芝之哀謝寶劍沉淪一朝千古此恨何伸返葬有期靈車在駕骨肉至情言與涕下今日何日節近重陽幽明之訣盡此一觴嗚呼哀哉尚享

祭太淑人熊母龍氏文

言言舊族有毓其華俛俛名流有宜厥家敬匪都臺為
國之儲人言有子式彰慈訓老循內則懿此德容人言
有母庶幾女宗曷褒其名孺書錦軸曷貴其躬翟冠象
服貴而能約五福尤宜耄而愈健百齡是期問安孔時
訃音忽告惟家之艱惟善之悼帝頒卹典用示顯揚安
葬有使諭奠有章歿焉盡傷死也榮豔嗟太淑人亦復
何憾某等忝與令器誼重同年升堂之慶不及生前遠

望靈輒兆符佳地執紼之誠莫獲往致辦香一炷魯酒
一卮臨風三酌竚其鑒之尚享

祭張公文

嗚呼張公廼止于斯天胡畀之遠器而弗宏其受降之
長才而弗究其施驚訃音之來告咸束望而興思惟公
早魁一省擢第明時黃門給事公爾忘私京尹僕正慎
厥攸司遂進佐于司馬爰克整于六師忽西戎之失御
副主上之疇咨征馬既秣兵車載脂始焉誓之以威武

終也撫之以恩慈圖振旅希蹤于充國肯貪功生事于
郅支賞未酬而適惟青會環將賜而與世辭嗚呼張公
真止于斯繫公雖止而猷老有正毅可盡之節有修偉
可圖之姿有匡國可行之疏有鳴盛可傳之詩彼得失
之萬變渺塵海之一絲是亦不朽何憾于茲某等名同
甲榜義重連枝相違兩地敬奠一卮悵歌殘于晞露恍
帷動于靈颺竚英魂之來格鑒薄意于陳詞嗚呼哀哉
尚享

祭從叔處士彥華甫文

曰嗚呼相湖之孫尚書之弟倜儻不羣號稱速器方當壯歲有志亢宗云胡暴疾遽歿塵踪上捐老親下遺稚子天乎人乎奚至于此安其歲晏發引在茲臨風三酹有涕漣漣嗚呼哀哉尚享

至京轉官告文

某被召三月廿四日至京廿八日上荷天恩進副宗伯仍兼翰林長入侍東宮自顧非才曷勝茲選追惟先訓慚

懼交并牲醴在陳用伸虔告尚享

篁墩文集卷五十二

欽定四庫全書

篁墩文集卷五十三

明 程敏政 撰

書簡

擬鄺食其上漢王書

臣聞天下有大義之所在而舉世莫能知者請得與大王言之夫今海內諸侯所以並起而亡秦者凡以絕六國之祀戕虐生民而已然其大罪有天地所不容者大王固能知之不乎臣竊料大王不知也夫秦之大罪在

於滅周周者天下之共主歷年八百文武之澤未泯也
嗣君無大失德聞天下而秦以強不義取之是以臣滅
君也以臣滅君自開闢以來惟浞羿與秦三耳天下之
罪顧豈甚於此哉項籍手裂土以資亡秦之後六國之
後皆有分地乃不求立周後而尊楚懷王孫心為義帝
此臣之所未解也夫所以亡秦者公天下也今楚人徒
以懷王之忿自帝其主則是復私怨矣名之為義安所
施乎楚之先王嘗欲滅周東周公諭止之曰裂周之地

不足以取國得周之地不足以勁兵然則楚之無君罪
與秦等心豈可帝乎傳曰見義不為無勇也臣願大王
明告諸侯復立周後相與北面而事之楚之遺孽反其
故位則君臣之義一日暴於天下而強不義者懼矣且
臣非不知大王楚人然楚亦周之臣耳況已析圭而王
王者動必視義之所在豈肯顧小嫌誤大計哉恃此而
言大王固將終聽之矣周後既立大王尚與諸侯會盟
洛水之上同獎王室有弗率者伏大義而誅之退守西

藩世為周輔臣知大王之名將與九鼎同重於後世豈
不盛哉捨此不為無復可為者矣

鄴食其請立六國後
而不及周予故補此

古

擬朱子答王晦叔書

承來喻以熹承乏講筵當天子宅憂之時擇日開講為
未合於禮經足見君子教愛之厚然於鄙意亦自不能
無可疑者夫人君諒陰三年不言古之道也而周之盛
時已不然矣大抵王侯以國為家雖先君之喪猶以為

已之私服其禮與廢人絕異故孟子以為未學如來喻
所引記曰斬衰唯而不對齊衰對而不言是故有難言
者矣天子喪禮雖不得詳而顧命康王之誥實後世之
所當法顧命太史道揚末命曰命汝嗣訓臨君周邦王
再拜興答曰眇眇予末小子其能而亂四方以敬忌天
威則固非唯而不對者矣來喻又引記曰大功言而不
議曰大功廢業且云大功尚不可議況於衰麻之至戚
此尤說之不可通者中庸曰期之喪達乎大夫蓋期以

下諸侯絕大夫降矣其可以為天子不言之證乎至於
本朝典故來喻以為未審何似此則熹之所熟諳者也
當神考升遐哲宗嗣位伊川先生首為侍講其言行昭
昭見於遺書史傳而其大者則冬至百官表賀先生上
言節序變遷時思方切請改賀為懋此其明驗也夫先
生承絕學後言動皆禮之所在顧熹何人乃獲嗣守職
業惟勉循其道而已蒙君子惠然有意於僕不敢不敬
布所悃惟執事者亮之

晦叔名炎婺源人學者稱饒溪先生常通書朱子問字宗宅憂

開講之禮朱子集卷人書此二
千篇獨不答此書故借擬答之

簡羅修謨明仲論歐公九射格義

明仲先生足下昨於史館談及歐公九射格義足下以
區區之說為新意而謂已說得歐之心當時未有以應
也歸而思之於鄙意有未詳者區區之說以謂置侯於
此覆籌於彼探籌而射於侯上啓而視之中者飲不中
者無所罰足下之說以謂人各當侯之一物而後探其
籌值所當者飲不值者無所罰蓋鄙意以侯與籌必相

須而不相離足下之意判侯等於兩途而置侯於無用之地由此意推之則人當一物而侯可廢此足下之說區區未詳者一也歐公此圖題其名曰九射格格者局也而今之為格與局者有擣蒲有彩選有手談有象戲此之所為格者猶彩選之格擣蒲手談象戲之局也此之所謂籌者猶擣蒲彩選之骰手談象戲之子也擣骰於格之中行子於局之間蓋必然之理使如足下之說則是捨格而擣骰外局而行子也矧投壺與此格皆祖

射之義以立法探籌以射侯亦猶引鏃以貫革操矢以注壺豈可置侯於無用之地哉此足下之說區區未詳者二也足下以歐所謂九侯虎居上熊居中鹿居下鴈兔魚居左鵬鳩猿居右者正射賓相當之次序此尤不可通者蓋物必有則所謂上下左右者乃造物創始之制云爾豈射賓相當之次序哉夫長筵廣席之上則令從者奉格而前以就賓之探射小飲圍坐之際則安此格於席心而奉之之時不可傾倒安之之處必有定向

則上下左右者寔立法之當爾此足下之說區區未詳者三也歐所謂皆置其熊籌者蓋懼賓之易酣也故曰中則在席皆飲苟或用之則亦有射中與否之時審如足下之說盡探其籌而總較其飲則二十七人在坐必有三人得熊籌而在坐者既有射中之飲又有三中熊之飲一探之間飲三爵者皆是而飲四爵者過半吾恐古人不如是之酗也此足下之說區區未詳者四也凡足下以區區之說為新意者考之於歐為頗合故以書

告於執事者夫格物致知學者之首務惟足下舍已從人以求歸一之論則他日尚有大於此者就正於有道也

與何憲使廷秀書

僕與閣下相別為日既久中間嘗一致問起居閣下亦蒙以五代史見貺自是音問闕然每用耿耿同年友林亨大來言閣下在閩手編古文選粹告成因竊自念處繁劇之地而能不廢鉛槧之功如僕之不肖承乏詞臣

乃終歲碌碌奔走黃塵赤日之下將自墮於暴棄之域
反思故人驚汗浹背矧今之號書生者每乏經世之畧
據要津者或取無術之譏有如閣下仕優而學者幾何
人哉此僕所為茫然自失者也僕自去歲抱疾雖愈而
間作平昔著述之志已灰但規為侍親之舉向相約為
通鑑續編蓋先師呂文懿公因景泰間所局修者重加
筆削而勝國時天台徐訖亦有續通鑑要言一書合而
觀之亦多不能了了事體重大又無友朋相與下上其

議用是姑置之耳病後無以遣日嘗著史論數篇又編
蘇氏檇杙皇明文衡宋遺民錄三書有便容寄上以求
是正僕微人也而寓于瀛兩邦之先哲遺文多至散失
故嘗蒐輯為新安文獻錄瀛賢奏對錄兩本亦俟脫藁
別呈也家君自號晴洲釣者曾求諸公文字詩章欲得
閣下一頌以為溪山之輝想賜不拒其詳載於別紙維
時盛暑尚謹重眠食以副朋舊之望

寄安福吳學士先生書

奉違風采轉首數年緬想林下道體安和足慰後進翹
企之私往者婦翁文達李公先生古穰集荷蒙寵以序
文泉壤增重手藁藏于生所方欲鈐梓不意隣有回祿
之變倉卒搬移書帙散亂竟爾亡去不勝惘然用是輒
敢冒昧再請錄過一本遇便示及足見前輩始終相與
之意生與妻弟尚寶君日夕引領在此老先生必能諒
之

簡太守武邑王公而勉諭諭祭禮書

諭祭乃朝廷大禮當時降有儀注其迎接贊唱使者及喪主各有位次易服止哭亦有節奏孤前者出京時曾於禮部錄得一紙偶爾檢尋不獲蓋文上有皇帝字與詔勅等詔勅常下於郡邑故儀注常存諭祭惟二三大臣得之而亦有不得者以其不常下於郡邑故儀注少見伏惟閣下念此大禮檢閱典故俾執事者少加講習庶行事之際不愆於度成此盛典以幸先人且使窮鄉下邑得見朝廷優禮舊臣及賢郡侯秉禮將命之美孤

嘗備員儒臣不敢不以奉告萬萬加察

寄李尚寶士欽書一

途中果有書覆未審俱達左右否孤已於三月二十八日到家祇奉几筵苟存視息所幸慈顏康寧不減於昔姚進士先到十日矣諸事方在分理尚未興工仰賴朝廷恩典必獲奉襄大事惟病妻穉子寄食高門有累仁慈為不安耳萬老先生處碑文不惜頻造一請葬期決在七月終緩則誤事奈何奈何贈誥必在五月領出續

當另人奉請回還瑩姬舊恙全可調理省氣為佳銀一
兩寄與汪保祖保京中諸親家故舊不能一一作書乞
便中致意舍妹及三弟婦俱安好二姪女尤聰穎異常
他日亦足為門戶之託何必男子此意可達凌趙二親
家一知餘不悉

二

程副使寄來書知京中消息所云金姓吏書尚未之見
但僕自途中抵家共稍書六紙來喻並不開到否豈一

時忘之耶六月三日金侍郎段御史及兩司遣人送賴
州曾守經山人來始定一穴哀疚之餘得此少慰葬期
決在七月終矣恭諡士敬久屈之志少伸然猶未滿下
懷不知此時所請遂否老天必念先文達公不使遂如
此也瑩姬病既全愈猶須將息但與小兒女輩擾湊宅
中日夜不安來書所喻不知缺何等待奉殊非骨肉相
愛之意汪保性難調且勿拂之俟少長方可責禮恐拂
之數數轉難調護祖保開已離乳未審的否此兒衆賦

弱我意今冬離乳為善不知緣何遂離之早也姚進士
深念閣下分上用心到十二分地位言之不盡也相見
乞代謝一二

三

八月半後連得弭貳尹程訓術寄來二書知士敬榮輝
恩命出于常典憂戚中不覺為之雀躍此雖士敬才力
有以自致青雲而朝廷垂念舊臣之義與我文達公積
慶裕後之德皆不可忘也尤當秉禮守法以敬承之則

名位之來益不可量所恨江山脩阻衰經在身無由追
逐賀賓亮能情恕病妻穉子擾溷高門非一言可盡已
先令小僕寧赴京探望僕少待塋所事完當有謝恩之
行尚容面既

與陸諭德廉伯書

孤不孝不悌不慈罪重惡劇以致酷罰沛鍾于家三四
年來連喪兩姪一弟血淚未乾上延先考追思殞滅越
無望生全匍匐南奔夜以繼日幸於今年三月廿八日

抵家獲奉几筵仰慰慈親苟存視息朝廷所遣營葬使
臣方議庀材鳩工空期尚未有定也孤臨發京師過蒙
辱念契家哀集厚賻再勞鴻筆紀述先猷瀕行又獨追
送數十里外開諭勤惓義同骨肉道出毘陵復蒙老先
生冒雨出城過舟相慰禮貺兼隆輒因使人附此致謝
千萬照察

簡廣東李憲副廷璋

年兄榮擢適不肖有先公之喪過蒙累次慰諭禮情兼

卷五十三
隆至今感感又蒙指示曾守經山人果能高出流輩遂
使宅兆停妥先體獲安少逭不孝之罪此年兄惠也何
敢忘茲因族姪芳入廣之便寄此上謝不肖久已從吉
第以家口衆大一時未能赴京擬在八月間北行諸不
能盡

答湖廣何方伯廷秀

遠蒙厚意賻奠踰等俱不敢當重以手書慰諭再三又
不敢却感今悼昔大慟而已先公宅兆拱俟朱生久而

不至已得賴之與國曾守經山人與一二鄉術規畫悉
定襄事在通虛辱盛意情甚不安謹禮而遣還諸事倥
惚又不敢以俗禮寄瀆謹此以申謝忱萬一惟執事者
亮之

與林文美表弟書

挈家南歸至新橋始得尊舅之訃為之大慟不能已已
計惟吾兄昆仲及老姪夫人遭變摧裂何以堪處然尊
舅去歲得會老母夫人于江南今歲又得盡見諸郎然

後告終于故鄉之境斯亦可以無憾矣再行匆匆秋雨不止殊使人有死生離合之感不能自勝輒拭淚成奠章一道并祭儀一兩因便寄附乞為上告几筵少伸孤甥與舅永訣之意尚冀節哀順變以襄大事不具

答衍聖公書

前歲冬不幸先公棄背已蒙閣下不鄙親至謁居慰吊至今感感舊歲春奔喪南歸嘗託臨清驛寄奉先公墓志一紙少達區區計徹左右茲者謝恩北還何以又辱

盛价與禮生賚賜手書及奠章禮幣此雖出君子過厚之義然在僕則何以克當又不敢却徒增惶恐而已在家即聞太夫人之訃嘗附非儀於士欽尚寶昆仲同作奠章一通寄三叔憲副先生處料轉達久矣昨過臨清賤累亦有一奠章望祭令嫂夫人之墓并非儀復寄三叔處此必未到也使回匆匆無以為禮謹附上香四炷少伸几筵之敬明春北上更當專書奉謝不一令兄大人前不敢瀆書同此拜意

簡李武選應禎

寓此四十餘日荷蒙執事表章先德慰藉餘生委曲之情雖骨肉無以述此日昨專造思欲一拜以盡區區車從遙在范祠不遂所願束裝匆匆不及再候涼沐情愴也尊容及張草各已下一轉語技止乎此無以仰副雅意奈何奈何春雨軒詩自見集續三體詩永齋存藁共五冊遣還魯齋書疑一冊託吳鳴翰傳鈔畢日令家僮康送上中州鼓吹集唐絕句學餘錄共五冊借去付坐

船水夫寄還餘不一

與巡撫南畿尚書三原王公書

僕自舊歲春初謝恩赴闕秋盡方還承聞台候親屈左
顧先塋不能操几杖聆謦欬以遂願見之心為之不滿
者累日改服以來又將束裝北上不能遠趨行臺以謝
盛德徒切耿耿因便冒昧玆此申起居之誠兼有少稟
微之為郡古稱文獻舊邦然人徒知朱子出徽之婺源
而不知二程亦出徽之休寧其事具載舊祠記及程氏

譜牒可以覆驗今縣學師生欲於原行起企德堂中奉
二程夫子左右列祀鄉賢未敢自專上請台命倘蒙垂
意斯文使先正之流風遺迹不至無傳獎鄉之後學小
子有所觀法其於弼教明倫興道善俗之事或有小補
維時春暮千萬為國自愛

與提學要侍御克讓請立二程夫子祠堂書

側聞閣下垂意斯文許於獎府儒學修復文公祠堂甚
盛心也僕常見文公每厯州縣諸所未遑即首訪先代

名賢祠墓汲汲表章惟恐弗及誠以風教所繫不可視
為故常而近歲以來巡行使者知有簿書期會而已能
如閣下究心正學知所先務者幾何人哉寒族在徽郡
最蕃僕之一派號陪郭程氏於河南最親蓋河南之程
寔忠壯公之裔陳末北徙而伊川先生諸孫又從南渡
居池州再遷休寧陪郭之程互相繼絕譜牒所載有胡
雲峰鄉賢祠記跋與南宋錄用伊川諸孫公移譜牒之
類具存可覆考也僕每欲倡鄉人重立一祠而事力弗

逮數用悵然況兩夫子遊宦謫居之所尚多奉祀徽之
休寧乃其宗祖開先子孫復業之處顧無棲神之居誠
為闕典倘行部至日命府公縣宰申明修復如文公祠
例豈獨一宗之幸哉邇者府官於黟縣學中起企德堂
一所尚未結束若稍加大之中以奉兩夫子而左右廡
以祀本縣名宦及一鄉先達上廣閣下敷教之地下啓
後學向道之心所費不多而所益則大矣僕託同年之
誼事閣下為兄偶有所見輒以上告若大行之已之在

閣下矣二程夫子遺跡一冊隨此奉上幸徹尊覽不宣

二

鄭生來獲奉手教及悔菴詩鈔如見顏色而聆警歎充
然自得者累日兩程先生祠事遂蒙采納尤見衡道之
切興道之勤非常情可及然此豈獨以幸一鄉輩一族
而已廣先正之教言啓後生之觀法將於此卜之而尤
不能不仰成于閣下今儒學有文上申行臺望早示符
移俾郡邑有所持循而樂為之僕亦當倡率鄉人目覩

盛事之有成而後北上也。容當請名筆續紀之以永示我鄉人。俾勿忘閣下之功。維時暮春末由會晤。千萬為道自重。以副羣望。不宣。

與南安張太守汝弼書

奉別以來不幸有先公之喪。塊處山中。倏踰三載。今雖改服。尚以家累衆大。天氣炎燄。未能北上也。向蒙惠賜晴洲賦。先公僅嘗一讀。口稱竒才。命諸子寶藏之。追念及茲。不覺涕殫。今郎進士。公在京嘗沐過憇。大能篤契。

家之好可喜文學之優得之家傳者固不待言也計年
兄在任已久政聲流聞或有考績之行小弟當需次京
師高會可期矣因族姪芳入廣之便輒此奉問起居頑
弟敏德性好書札甚欲得年兄妙翰以為楷式倘賜不
愆得備私淑之餘何幸如之維時仲夏尚謹重眠食以
副朋舊之望

與張同年書

遠承惠書知吾存簡遂至不祿為之失聲不能已已所

幸閣下篤師生之義經理後事周悉如此又足以自慰也志銘本不敢當念霈生遠來重以亡友之命勉強成之且聞葬期已迫急欲慙慙其歸無暇修改殊不稱意慚負奈何所遣禮幣並用納還僕已釋服將北行未由會晤也敬此申覆

與太守河汾王公文明論世忠廟產書

休寧諸生程敏政齋沐裁書頓首再拜侍御太守王公執事僕自府下奉別之後即與諸族人會譜以七月一

日侵梓起工參訂校勘無一日之暇迨今已四踰月次第將完而譜後文字尚未刊也樊族之會者近則一郡六邑遠則德興樂平浮梁貴溪開化共四十四支子孫之見在可以叙昭穆者踰數千人皆出晉新安太守元譚公陳將軍忠壯公後蓋宋元以來家自為譜莫能相通今藉先世之靈幸而告成擬奉斯譜躬率諸族人呼太守公墓奠忠壯公祠然後給譜而散立石祠下以告後來俾知我太守忠壯二公之遺烈不泯裔嗣蕃昌有

如此者間因編刻之暇考及上世之事乃知太守公墓
在向杲嘗一見侵于元季得裔孫休寧漢口自得者以
金幣復之又一見侵于國初得裔孫婺源高安達道邦
寧者以寶鏹復之具有總管虛谷方公修復之碑及樂
平歛東族人往返之書可證忠壯公祠在望墩當宋之
季得裔孫休寧漢口端明公必會里樞密公卓大卿公
覃歛槐塘知錄公旂及僕先祖陪郭掌書公璋將仕公
瑜六人買地建廟捨田供祀召僧慶如侍奉香火當元

之時廟田為醫學提領范天錫所侵得裔孫歛長翰山
副使公思敬告官追復禁約侵犯嘗請道士程處訖奉
香火具有宋端平二年申狀及元泰定四年榜文可証
反覆考之自宋以來太守之墓忠壯之祠凡修復者今
方氏無尺寸之功凡捐舍者今方氏無尺寸之地蓋今
方氏自洪武初始為廟祝依神之居食神之食衣神之
衣將近百年而不思所以報神之德乃敢冒我程姓鬻
我祭田又謂太守公之墓是其祖墓意欲泯故郡之循

良茂聖朝之祀典亂常瀆禮莫甚於斯所猶幸者得執
事下車之始即以祀事為重以表章忠賢為心清明在
躬致神明有感夢之異挾摘無隱使小人服如律之辜
遠近傳之無不稱快而況前日舍田復墓之人皆今次
統宗會譜之族一聞其事莫不驩然思拜謝于執事之
前者邇日以來復聞方氏再有言于行臺事或懼于中
變諸族人又莫不戚然思進訴于執事之前者夫以太
守公徽郡循吏第一事載郡志其子孫原復墓稅舊隸

世忠廟中今若使一抔之土屬之異姓而不為之申理
則與世之傭人佃屋者何異為子孫者何以堪之百世
之下繼綰郡綬者又何以堪之忠壯公有功於徽郡尤
多其大者如滅蜃妖以奠民居禦侯景以全民生名著
史冊沒受王封其子孫原捨祭田舊立世忠廟戶今若
使巫祝妻孥入其戶內而不為之屏除則與世之餒鬼
無嗣者何異為子孫者何以堪之百世之下有功桑梓
者又何以堪之夫太守公墓稅不歸于廟則後日樵採

孰能禁樵採不禁則其勢不至於盪平不已蓋稅既屬
之他人則興廢即繫其手故也忠壯公廟戶不正其籍
則後日私鬻孰能沮私鬻莫沮則其勢不至於盡絕不
已蓋人既入于廟中則事產即其已物故也噫以程氏
先世體魄之所藏烝嘗之所奉廟祝一夫侵之有餘子
孫千人復之不足仁人扼腕行道傷嗟然僕逆知其決
不至此極者以執事在上既正其始必成其終念甘棠
而罪其剪伐覩喬木而矜其雲初舉錯一行人神胥慶

而執事陰隲之厚祿位之隆子孫之盛有不可以言贊者矣弊族人雖所居有別州異縣之不同然雅聞執事以慈祥愷悌之心布忠厚寬大之政皆欲一趨府下望顏色候起居祝千百歲壽以福吾民以謝盛德以徼惠於上世僕不佞輒敢以書先之若太守公墓稅當入于廟忠壯公廟田當正其戶此本執事所具知何待僕之贅言而中不能不有言者尊祖敬宗之念人心所同天理民彝所繫非敢有私請計亦長風化者之所樂聞而

不拒者也干冒威嚴不勝悚仄之至

簡點縣江尹

恃愛輒有少瀆僕近欲編刻二書其一曰新安文獻錄
將萃六縣先賢遺文以傳四方其二曰新安程氏統宗
世譜將合六縣程氏宗派以傳子孫凡先賢及先世之
出於五縣者多已搜訪惟縣尚多遺闕考之縣志先賢
有樞密汪公勃與程之先世有顯謨閣學士邁及其從
孫少師莊節公叔達兩家必有譜牒家集之類其子孫

亦必有庠生儒士之流惟政事之暇不惜一問錄其行
實碑誌家傳遺文之屬見寄使此二書者得無遺珠之
歎用以成區區敬鄉睦族之志皆盛賜也程氏統宗世
譜擬在七月一日先行侵梓早得一人可與言者一來
尤感感也

簡德興方尹汝高

僕自會譜以來數有書奉瀆甚以為愧然自計之一皆
先世祠墓見侵於人者不能不求伸于左右爾又計閣

下必亮此心言雖多而聽之將不厭乎德興新建族人
出于宋端蒙先生之族端蒙者文公門人也其先世與
僕皆共祖忠壯公忠壯有祠在隆教寺聞有異縣僧越
例來住且有誣訴在官惟閣下念先賢之後宗正道而
斥異端扶善良而抑姦橫實一族之大幸也遠邇傳播
懲勸攸分其於風化將亦不為無補又不獨為私慶而
已

簡婺源陳簡教諭

玉汝廷器遠來承華翰多感第行李匆迫莫由會晤為
歉耳闕里暨明經書院二記不敢以尋常應酬之作例
視容舟中為之寄上兩處文幣不敢辭闕里別有銀伍
兩託二生納上乞轉付朱貞凡卿為修葺祠堂之助士
奇訂棟莠聯輝樓記正欲舉筆不意失去請文帖子竟
不能措一詞望另具一紙來亦容異日寄上所借諸書
今一一付還乞照數給與原主庶有下落餘不及悉

簡太守河汾王公

奉別已歷三時流光迅速可畏如此瀕行蒙遠餞張檢
府來又承惠寄愛厚踰分何德可堪入覲在即總當面
謝先世廟田遂得清白二程先生祠堂又獲祀典皆左
右作興之力也公差吏程智族姪孫因其歸便附此布
惻惻情照萬萬

寄歐陽大尹子相書

別後熾暑畏途甚苦六月十日始達京師仍舊供職碌
碌而已兩夫子祠事已成早晚命下當付智領回適者

貴近異端貪刻之流或竄或殛或逮或咎正論以伸朝
政以肅中外之慶也卽報之常不能一一近始識令弟
進士端謹有學足稱二難第兄中末由數數晤語茲因
家人寧歸輒此奉問起居候智去別有修奉秋涼初至
山縣無警異自愛不具

簡富溪宗人景宗

別後忽得霍亂疾至今尚未平復盛族衣冠相承文獻
不乏自足名世譜之會不會固不足計也若先世文字

中書誥敕牒文墓志之類欲取三數篇刻入貽範集雅
意以為何如

與東門四十七叔五十三叔書

久別無一字見寄甚切懷思因程安歸使附此更有一
事相告諸兒女輩多已長成京師貴戚公卿之家多欲
結姻但僕意在故鄉遂遲遲至今望垂意一訪先衛官
之家次鄉宦之家又次殷碩之家或求其女或擇其婿
務在家門清正容貌端淑倘如所願足見骨肉相與之

至情沒齒不忘矣有可以協力相圖者更自託一二人
庶幾易成也

與河南宗人博士通譜書

新安方宗敏政頓首奉書翰林博士先生宗長僕於閣
下雖未始接風采聆話言有一日之雅然竊自附于同
姓之義故輒以書先于執事者惟我程氏自東晉新安
太守元譚公以善政為民請留始居歛之篁墩傳十二
世為陳將軍忠壯公靈洗以全郡之功廟食鄉邦由是

子孫散處蔓衍支分積久彌盛其在新安者寔居他姓
十之七然自宋以來各相為譜未有會而通之者緬惟
兩夫子一房寔自新安遷中山博野再遷河南具有典
籍可以佐驗迨宋之季伊川先生子孫復從高宗南渡
居池州再遷新安休寧與陪郭程氏同居互相擇繼明
時嘗受恩典又與朱子通書而伊川子孫復有轉繼明
道之後于金陵者今樸所刻貽範集具載之不待贅也
劣宗寔出陪郭不佞竊有志于譜書又以先世嘗獲通

于兩夫子之裔水木本源之思誠不能忘此因祁門族
姪御史宏族孫布政泰適當官走中州輒請貴族支系
以歸而職務倥傯事體重大未能執筆者久之曩歲居
家之艱屏處山中遂發書於遠近之族告以會譜之故
凡本郡歛休寧祁門婺源績溪暨江洲樂平浮梁德興
貴溪開化淳安來會者四十四房參考訂証踰數閱月
始克成編而貴派適當首房乃知兩夫子之生雖天命
真儒以續聖傳啓來學事出非偶然太守忠壯兩公寔

一時循吏忠臣有大惠烈于鄉邦食報未盡者或于是乎大發之光遠有耀豈無自乎諸族家以數千百年之譜數千百人之族傳寫以藏不無謬誤相與鳩金刺梓號曰程氏統宗世譜告于忠壯之賜廟散諸各房用敷世牒蓋僕之初志雖欲收族以自附于先正而孰意其大有所成使南宗北拓昭穆分明能至此極也哉嘉與族人私自慶幸千載一日也茲因貴郡太守何公入覲南歸寄上原分一部并貽範集一部奉徹尊覽休寧舊

有鄉賢祠元泰定間所立專奉兩夫子之祀歲久傾圮
僕與縣侯重加鼎造上請于朝獲登祀典將與嵩洛相
望無窮此亦先世之靈惠導之使然有非淺薄所能與
力者碑文二紙因漫附呈貴派支系文獻收登未盡者
不愜一一垂示當續附入貽範集中使無遺珠之嘆用
備一家之書尤所望也臨風惘然不勝馳仰春寒硯凍
未釋作字欠莊統干心照不具

答黃州謝太守文安書

前在故鄉方圖一造山中奉餞不意旌旆遽行竟非所
願而僕亦不久赴京矣南北相望長切耿耿沈知事來
忽得手書如接顏面又承治郡之暇留意圖經可謂知
所先務迺出簿書之吏遠甚可羨可羨但諉以刺本重
編且以序文見屬僕何敢當來意又不可虛辱也祇領
厚儀不勝惶悚刺本乃一藩總志勢宜簡畧今閣下欲
成一郡之書鉅梓傳後豈可草草必須以舊志及永樂
二年景泰五年官修志書原本見付庶可參考為之不

然恐取誚大方家有負雅意司成邱公之心亮與僕同
彼必當有書報也觀新志黃州有二程先生子孫入國
朝來科第不乏此必有譜可據僕前曾程氏統宗譜時
却不知有此一派望一詢之備錄一本或有遺文遺事
併錄見寄使僕所會譜無遺珠之歎寔閣下之惠也新
刺程氏貽範集一部寄上引忱會晤末由心照不具

簡復范親家顯道

遠承遣人入京報小女姻事有成并致多貺禮意兼隆

重念小女于歸幸託高門詩禮之餘自母夫人以下無
不樂意但其賦質孱陋姆教生疎冀長者垂念示以敬
戒之道俾不失所底于成人何患如之遠情所鍾言弗
克既人回專此報謝尚俟舍下人還別有修奉惟順時
自愛

答汪巖秀才簡

春秋大義在于尊王近歲試官命題多欲右楚其失不
止文字間而已僕深病此每與知者言之忽得寄來長

書正合鄙意間以示館閣諸公率多嘉嘆可見天下理一如此說經之精持論之正若足下在吾鄉可多得邪更加勉之母趨時好他日大成未可量也因玉汝進士行附此冗中不盡所欲言幸加愛

與巡撫南畿都憲莆田彭公鳳儀書

奉別以來甚缺修敬每用耿耿側聞受詔總行臺於江南命下之日士夫相慶以為正人彙進治平可期不獨野人有息肩之賀而已僕數年來喪弟喪子上轍先公

憂疾之餘舊學荒廢徒塵講席暨宮僚之末上無補于
睿學萬一慚負不可言因便附上問起居并致賀忱杪
秋軒蓋入覲當有奉見請教之期餘弗及悉惟為國為
民自愛

簡樂平宗人貢士楷

德望進士處得寄字并家乘遺文石城支系收訖知貴
族長幼清勝可喜去歲失意南歸不及話別至今惘然
比日想學益加進多為吾宗出色一時利鈍固不足計

也剛愍公誥詞之類擬增入貽範集中俟刻完別當寄去因德望行便草草附此惟自愛

答富溪宗人景宗書

家門不幸有詹簿弟之喪坐此悲慟抱疾經時髮日以白亮一宗厚契必同此感寄來書多不及裁答然每觀吾子書輒喜以為最得我心如所稱刪史記十一字增姓纂六字皆他人所不及知者縱知之亦未必以為良苦也不意宗族中晚得吾子好學精進如此續譜序及

諸製作皆可觀但吾鄉詩文自為一家多不肯宗韓歐
及唐音故文體小詩格下此可與知者道耳先達如汪
浮溪羅鄂州方可師除此二家外近世惟宗老縣南趙
東山兩人耳以吾子向進不已故傾倒言之聞得泚水
全集若有內外制乞錄出見寄令尊先生索梅友詩
及富溪八景詩情思於邑中多未及作尚俟後來惟心
照不一

簡徐州同知宗姪孫玉

匆匆不能盡久闊之情登舟快然如有所失今日已抵
泗亭矣寄還二詩其一游桓山者可刺刺之亦以見一
時盛集周中允先生一兩日間必至彭城當一欸送且
道予沿途相候之意但恐天寒河凍復命太遲故不能
久留滯爾朱太守處轉致謝聲予亦有書附歸款也

與提學司馬侍御通伯書

為別不覺寒暑再更然友朋之思與停雲俱南第匆匆
不得佳趣寫此表素為歉僕自今春以來承乏日講兼

領史局雖終日從事簡編然所得益淺筆益退殆不復可進有愧故人多矣閣下在南畿既久聲聞益闢朱子所謂始而排中而疑終而大服真儒者之常亦可見涑水之遺教未泯也是可賀矣因禮部司務方君南歸附此問起居方君僕親家去不以罪士論多惜之其二子經綸學業頗成得並加與進少慰其落落之懷則彼拜惠遂與僕等矣會晤何時惟為道珍重

簡汪廷器

到京不久即得所寄書及東布兩端敬鄉之意豈餘子
可及僕來時令兄亦有書寄足下今以付盛价史主事
已相見亦盛稱足下好處唐負外未行俟議開鹽後得
勅乃東爾上等貂鼠皮煩尋六張次者六張并價值見
寄一一奉酬計不有訝盛暑亢暎移居匆匆不盡所欲
言

簡謝昌山人

久不得消息何似聞在青齊間不審此時曾過江否故

司徒黃公之子及張狀元同寅喪母俱嘗託書轉達欲請闡南江右一行亦不審米如彼願否也禮部徐亞卿先生於僕有詞林之舊因後夫人之喪又託一言亮賢者於仁人孝子之心必不忍負也書至幸即命駕萬萬冗中不盡所欲言

簡纂修袁進士

不幸聞先叔之訃不得置一尊為別此情缺然前所告獎鄉儒者有王宗植居歛之王村有程隱程亢居休寧

之汉口有程質居婺源之高安皆可備纂述有汪道全居婺源之大坂可備繕寫餘亦非僕所知也

寄閣老壽光先生書

宅上人還嘗附上起居茲因訓導仇潼拜掃東歸託書為先容潼家淄川博學能文兼有志操寔老先生貴鄉佳士且素慕勲德之盛欲候台埤一覩丰采別無干請望少遂其願見之心後學之幸非言可既

簡唐侍御希愷

三先生集序五七年前所成為北歸舟中考據頗詳整
使今為之亦無如此心力矣蒙索取再三得之樊篋披
誦一過恍如隔世因稍入近事錄呈自顧踈陋寔不足
以增輝先正姑少見其景慕而已

答汉口宗人志端

承寄書及東山集二冊收訖所託選承德堂文及武堂
世忠祠滇南吟藁和湖嶺亭四事入縣志但此志重勘
未完隨後自當附入用副雅意其餘詩文恐不能復增

矣新屯寺僧所託記文已成數語付南山菴僧雲清轉
附相見幸一語之所餽禮收訖道遠不能辭也因亡弟
之喪情緒憂鬱草草布此惟心照

簡山斗族姪孫天相

屢荷寄書及佳墨孔多愧無可答也因舍下人還附此
足下方妙年又無公家力役之征惟勉學以副一宗之
望為佳筠窓靜讀之名當不虛爾積中兄弟近日如何
亦都無一字相及見時幸一致意

與刑部尚書盱江何公簡

程本邑名在長安之北文王為西伯時居之後徙豐而以其地封大司馬休父為程伯蓋程得姓之始也考汲書文王有程寤之篇而亡其文意寤者省躬之義也以文王大聖人猶不忘于省躬而況末學哉走不佞竊敢以寤名進修之齋自附于公明儀之後敬乞一言記之使有所持循以不昧于成德之歸先生之賜大矣

簡強憲副廷貴

恭詒榮授恩命進副憲臺初政清明士類胥慶豈特同鄉同年之光而已況憲車既東風裁加倍益見君子所養非常情可及也僕供奉之餘學不加進無足為道因便附上起居無致賀忱惟自玉以膺多祉不宣

與閣老壽光先生書

遠蒙師尊遣人賜詩兩篇不勝驚喜但生初意欲得教誨一兩言今許與過望益增慚感謹什襲珍藏用夸子孫豈敢輕出示人以褻長者之賜恭審來人道體安和

欣慰無量生日侍講筵幸踵老先生之後塵雖附竭駑
鈍實無絲毫上補聖學愧懼而已朝報三十一紙附上
老先生雖處林下然愛君體國之誠義當有同其休戚
者伏惟台察

簡劉貢魁汝利昆仲

更化之初公論大出起舊之禮擬在旦夕但前此及近
時人言猶大可畏僕素受教門下亦濫在議中可畏尤
甚因閭閻歸使附此所冀賢昆仲益加謹畏庶副所望

此固高明所素有者亦致夫千里之意而已不罪萬萬
簡禮部尚書瓊山丘公

蒙先生厚愛雖骨肉無以踰此第恨無受教之期孤陋
終身為長者之玷然修身補過不敢自毀其平生則此
志固不衰也細思歐公朱子所居之位不同故所處亦
異蓋歐公身在相位上有英宗魏公故力辦得白文公
小臣生死在人掌握豈可以遺體而試煅煉不測之酷
此大賢善於處變亦其學識所至生固不敢上擬然生

上有七十二歲之母下有十三歲之子三世三人幸天子大恩俾歸田里含垢掩瑜不加誅竄實出望外夫復何言蓋生之愚見如此因一質于先生之前三五日出城不敢拜辭仰惟為道自重不具

簡李學士世賢

寺中檢獎篋得囊歲遊梁園佳句記當時曾各奉分四韻至今零落不成卷汝弼懋衡元益遂已作土中人而僕亦將歸老林下矣敢奉元韻乞齋居暇日煩畧構思

仍作當時語每韻少得四句以補完此卷使山中人異
時展玩得知帝都風物之盛而一時朋遊存沒離合之
感實足繫停雲之思亦非徒作觴咏公案而已惟不以
為斷簡宿逋大笑而置之為佳

簡辨上人

蒙承惠佳菜又於僧榻卧餐儼成有髮僧矣所和詩中
間佳句層出但微有重複今用古人摘句例商確數處
足成四章請重錄用圖書付來入卷庶此歸林下把玩

如揖清風也

慰余寘貢士簡

潞河舟次忽聞先公之喪為之愕然朝廷柱石當得幾
人僕輩歸休亦恃有善人在位得以藉庇為林下幸民
何天不吊而奪之速耶臨風揮涕不能已已粗帛一端
少充几筵辦香之敬舊詩一章不敢比于掛劍之義幸
一閱而焚之用還公之雅命云爾相見無期惟節哀展
事以副知舊之望

與河間太守謝公道顯書


昨在府中談及鄉賢祠事閣下欣然欲為之此誠一郡之幸舟中不揣盡解書裝緒閱考訂得河間鄉賢五人以功忠著稱于河間者十三人合於祭法所謂有功于民以死勤事及鄉先生歿而祭于社者因撮其大畧親書附上事果有成使先正得表章之美後學有觀感之益吏民長忠厚之風其為闡繫甚大至於屬州屬縣鄉賢名宦在景州若董相仲舒在滄州若張文節公及本

朝王忠肅公之類尚多自當依例舉行各為其鄉之重
郡固不能兼祀也祠立之後仍得宗伯丘公少宰楊公
一記庶幾百世之下知此邦盛舉自閣下始後來者宜
謹嗣之閣下雖不以此為名然所以繫甘棠之思者豈
有窮已哉旅次匆匆恐未能上副雅志更加詳訂可也

復族人祖瑗

承果寄書及孫良山先生詩一冊附以吳綿歛亭俱收
訖愧無可答也亡弟之喪抱疾經時計一宗厚契必同

此感令堂孺人節槩之懿聞者凜然有司上聞行臺取
勘亦曾贊一辭蓋方君付汪貢士轉託區區也因舍下
人還草草附此惟心照不具



簠塼文集卷五十三